

YaLiveKitap.blogspot.com


اثر

مرحوم ضیا پاشا

ترجیع بند


و

ترکیب بند



احمد کامل و شریکی مطبعہ سی

1928



503

YaziveKitap.blogspot.com

## ترکیب بند

- ساقی ، کتیر اول باده پی کیم مایه جاندر ،  
آرامده عقل ملامت زکانه و  
اول می که اولور صیقل دل اهل کماله ؛  
فماخته لرك عقلمه بادی ریاندر .  
پیر جام ایله یاب خاطری، زیرا دل ویران،  
مهجور خرابات اولالی خیلی زماندر .  
ساقی ؟ ایچلم عشقه زندان خدانک .  
رندان خدا واقف اسرار نهاندر  
ساقی ! ایچلم رغنمه صوفی حریصک ،  
کیم مقصدی کوثر، املی حور جاندر .  
عشق اولسون او پیر می پرورده عشقه،  
کیم باده سی صدساله وساقیسی جواندر .  
پیر میه صور مسأله ده وار ایسه شبهک :  
واعظلرك افسانه لری هپ هذیاندر .  
بن آ کلادینغم چرخ ایسه بوجرح چب انداز  
بخشی کورونور صورتی اما که یاماندر .

بکزر فلک اول چنبر فانوس خیاله ،  
کیم نقش قهائیلی سریع الجریاندر ،  
ساقی! بیزه می صون، که دل تجربت آموز،  
اندیشه انجم ایله وقف خلجاندر .

ایچ باده ، کوزهل سه و وار ایسه عقل و شعورک،

دنیا وار ایمش ، یا که یوغ اولمش نه امورک ! !

یتیمزمی بو قسری روش اغرب عالم ؟

بیر منزله ایرمه زمی عجب کوکب عالم ؟

شیمدی او یوانلر او زمانده او یانیرلر ،

بیر صبحه رسیده اولور آخر شب عالم .

پامال ایدهر انجم کیمک اوستنه دونسه ،

آغاز ایدهلی دوره بودر مشرب عالم .

بیک بویله جهان زروسیم اولسا یتیمه ز

ممکنی که اسعاف اولونا مطلب عالم ،

خارجدن اکر اولسه تماشاسنه امکان ،

مدهش کورونور هیکل مستعجب عالم .

آلمش یوکنی شوپله که سیرنده خللسز ،

بیر ذره دخی قالدیراماز مرکب عالم .

آبنای بشرده قلاجقمی بو معاداب

بیلهم نه زمان دوغرو لاجق مذهب عالم !

- هر صفحه ده بیر شکل حقیقت ابدیه ابراز ،  
• هر کون جهویر بیر پرورقه مقلب عالم .  
بیک درس معارف او قونور هر ورقنده ،  
• یارب! نه کوزل مکتب اولور مکتب عالم .  
بو جسم کشفک نرهمی مرکز قوت ،  
• یارب! نه مطیه یله کزهر قالب عالم ؟

سبحانک یا من خلق الخلق وسوی  
سبحانک سبحانک سبحانک ألفا

- ای قدرتکه اولماین آغاز و تناهی !  
• ممکن دکیل اوصافکی ادراک کماهی .  
هر نسنه قیلار وارلنکه حسن شهادت ،  
• هر ذره ایدهر وحدتکه عرض کواهی .  
حکمک قیلار اظهار بو آثار ایله مهری ،  
• امرک ایدهر ابراز بو انوار ایله ماهی .  
دلیر بساط نعمک مرع هوایی ،  
• سیراب زلال کرمکدر صوده ماهی .  
ایلهر کرمک آتشی کلزار خلیله ،  
• مغلوب اولور پشتیه نمرود مباهی .  
ظالمیری عدلک نه زمان خاک ایدهر جکدر ؟  
• مظلوملرک چیقما دادر کولکره آهی .

بیگانه لره منحصر انواع حظوظات !  
مختزده عشقه مخصوص دواهی !  
سنسك ایدهن اضلال نیجه اهل طریقی ،  
سنسك ایدهن اهدا نیجه مکشته راهی ،  
حکمك که اولاً موجب خیر و شر افعال ،  
یارب ! نه ایچیندر بو اوامر ، بو نواهی ؟  
سندندر آلهی یینه بو مکر و بوفته !  
بو مکر و بوفته یینه سندندر آلهی !

کفتی بکن و باز زنی سنك ملامت !

دست من و دادتودر روز قیامت

پیر قطره ایچن چشمه پر خون فنادن  
باشن آلاماز بیر دخی باران بلادن ،  
آسوده اولام دیرسهك اکر کله جهانه ،  
میدانه دوشن قورتولاماز سنك قضادن .  
ثابت قدم اول مرکز مأمون رضاده ،  
وارسته اولوب دائره خوف ورجادن .  
دورسون کف حکمکده ترازوی عدالت ،  
خوفك وار ایسه حکمه روز جزادن .  
هرکیم که آرار بوی وفا طبع بشرده ،  
بکزه ر اوکا کیم دولت اومار ظل هادن .

بی بخت اولانک باغنه بیر قطره سی دوشمه ز ،  
باران برینه درو کهر یاغسا سمان .  
ارباب کالی چکمه ز ناقص اولانلر ،  
رنجیده اولور دیده خفایش ضیادن .  
هر عاقله بر درد بو عالمده مقرر ،  
راحت یا شامش وارمی گروه عقلا دن !  
حل ایتمه دیلر بو لغزک سرفی کیمسه ،  
بیک قافله کچدی حکمان ، فضلادن .  
قیل صنعت استادی تمیله تماشا ،  
دم اورما ، ا کر عارف ایسه ک چون وچرادن .

ادراک معالی بو کوچوک عقله کر که ز ،  
زیرا بو ترازو او قادر ثقلی چکمه ز .

دهرک نه صفا وار عجبا سیم وزرنده ؟  
انسان بیراقیر هپسینی حین سفرنده .  
بیر دنک و فوارمی نظر قیل شو سپهرک ،  
نه لیل و نهارنده ، شمش و قرنده .  
سیر ایتدی هوا اوزره دینیر تخت سلیمان  
اول سلطنتک یلر اسر شیمدی برنده .  
حر اولق ایستر ایسه ک اولما جهانک  
ذوقنده ، صفا سنده ، غمنده ، کدرنده .

جانان كیده ، زندان داغیلا ، می اولاریزان  
بویله کیجه نك خیر اومولورمی سخرنده ؟

خیر اومما ا کر صدر جهان اولساده بالفرض ،  
هر کیم که خساست اولا عرق و کهرنده .

ییلدیز آرایوب کوکده نیجه طرفه منجم  
غفلت ایله کورمه ز قویوبی ره نرنده .

اونلر که ویریر لاف ایله دنیا به نظامات ،  
بیک تورلو تسیب بولونور خانه لرنده .

آینه سی ایشدر کیشینک لافه باقیلماز .  
شخصک کورونور رتبه عقلی اثرنده .

بن هر نه قادار کوردم ایسه بعضی مضرت  
ثابت قدم یینه بو رأیک اوزرنده .

انسانه صداقت یاقیشیر کورسه ده اکراه ،

یاردیم جیسیدر دوغرولرک حضرت الله

غدر ایده رعایاسنه والی ایلت ،

دنیا ده وعقباده نه ذلت ، نه رذالت .

لا یقیمیدر انسان اولانه وقت قضا ده ،

حق ظاهر ایکن باطن ایچین حکمی امالت

قاضی اولا دعوا جی ومحضر دخی شاهد ،

اول محکمه نك حکمه دیرلرمی عدالت ؟



ای مرتکب خر بو نه ذلت ، که چکرسک ،  
بیر قاچ غروشه مدن عمر کجه خجالت !  
لعنت اولا اول ماله که تحصیلنه آنک ،  
یادین اولا ، یاعرض ویا ناموس اولا آلت .  
آدم اولانک خیر اولور آدملره قصدی ،  
انسانلغه انسانده بودر ایشته دلالت .  
انسان اوکا دیرلر ، که ایده قلب رقیقی ،  
آلام بنی نوعی ایله کسب ملالت .  
آدم ، اوکا دیرلر ، که غرضدن اولا سالم  
نفسنده دخی ایله یه اجرای عدالت ،  
صادق کورونور کسوده ارباب خیانت ،  
مرشد صابیلیر وهلهده أصحاب ضلالت .  
اکثر کیشینک صورتنه سیرتی اویماز ،  
یارب! بو نه حکمتدر الهی! بو نه خالت!

امید وفا ایله مه هر شخص دغلاده

چوق حاجیلرک چیقدی خاچی زیر بغلاده

بیر عبد حبش دهره اولور بنجت ایله سلطان ،  
ضحاکک ایدهر ملکنی بیر کاوه پریشان .  
اقباله ، ادبارینه بل باغلامه دهرک ،  
بیر دائروده دور ایدهمز جنبر دوران .

ظالم يینه بير ظلمه كمرفتار اولور آخري،  
ألبته اولور او بيقانك خانه سي ويران  
أكثر كورولور چونكه جزا جنس عملدن،  
أجمامده آهندن اولور رهنه سوهان ،  
تذكير اولونور لمن ايله حجاج ايله جنكيز ،  
تجبل ايديلير نوشران ايله سليمان .  
قابلميدر أفاظ ايله تغير حقيقت ؟  
ممكني كه تفريق اولونا كفر ايله ايمان ؟  
بير خا كدن انشا اولونور دير مسجد ،  
بيردر نظر حقندن مجوس ايله مسلمان ،  
هر دردك اولور چاره سي ؛ هر ايكله ين اولمه ز ،  
هر محنته بير آخر اولور ، هر غمه پايان  
كه چاك اولونور دامن پاكيزه عصمت ،  
كه عفت ايدهر آدمي آرايش زندان  
صبر ايت ستمه ايستر ايسهك حسن مكافات  
فكر ايله نه ظلم ايله ديلير يوسفه اخران ،

ظالمير بيركون ديديرير قدرت مولي :

« تالله لقد آترك الله علينا »

هر شخصي حريم حقه محرم مي صانيرسك ؟

هر تاج كين چولسزي ادهم مي صانيرسك

دھری آراساڪ بیکده بیر آدم بولامازسك ،  
آدم کورونن خزلری آدم می صانیرسك ؟  
چوق مقبلی کوردم ، که کولر ایچی قان اغلار ،  
خندان کورونن هر کسی حرم می صانیرسك  
بیل علتی ، قیل صو کرا مداواته تصدی ،  
هر مرهمی هر یاره به مرهم می صانیرسك ؟  
کبره نه سبب ؟ یوقسه وزیرم دیبه کرچک  
س کندیکی دستور مکرم می صانیرسك ؟  
اگ مفتخر دولت یک روزه دنیا  
دنیا سکا مخصوص و مسلم می صانیرسك ؟  
حالی نه زمان قالدی جهان اهل طمعدن ؟  
سن ذاتکی بو عالمه أَلزَم می صانیرسك ؟  
أی اوممادیفك کشف ایدر اسرار دورنك ،  
سن هر کسی کور، عالمی سرسم می صانیرسك ؟  
بیر کون کله جک سنده پریشان اولاجقسك ،  
أی غنجه بو جمعیتی مردم می صانیرسك ؟  
نامرد اولایم چرخه أ کر منت ایدهرسم ،  
جور کله سنك بن کدر ایتسه م می صانیرسك

اللّٰه توکل ایده نك ياوري حقدور،

ماشاد کوکل بیر کون اولور شاد اولاجقدر.

پك رنگنه آلدانما فلك أسكى فلكدرد؛

زیرا فللك مشرب ناسازی دونكدرد.

یا بستر كخاده، یا ویرانده جان ویر؛

چون بای وكداخا كه برابر كیره جكدرد.

آلهه صیفك شخص حلیمك غضبندن

زیرا بوموشاق خویلی آنك چیفته سی پكدرد.

یاقدی نیجه جانلر اونزا كته تبسم

شیرك دخی قصد ایتمه سی جانه كوله ركردرد.

بد أصله نجاتمی ویریر هیچ اونیقورما؟

زردوز پالان اورسك أشك پینه أشكدر.

بدمایه اولان آ كلاشیلیر مجلس میده،

عشرت كهر آدمی تمیزه محكدرد.

نصح ایله بوله كله نی اجهلی تكدیر،

تكدیر ایله اوصلا نمايانك حقى كونكدرد.

مادانلر ایدره صحبت مادانه تلذذ،

دیوانه لرك همدی دیوانه كر كدر.

عفو ایله مبشر میدر أصحاب مراتب؟

قانون جزا عاجزه می خاص دیمكدرد؟

میلیونله جالان مسند عزتده سر افراز،

بیرقاج غروشی مرتكبك جایی كوره كدر.

ایمان ایله دین آقچه در ارباب غناده

ناموس و حمت سوزی قالدی فقراده

اقبال ایچین احبابی سعادت یکی چیقدی،

بیلمه زایدک اول بو درایت یکی چیقدی .

سرفت جوغالوب لفظ صداقت مودالاندی،

ناموس تمام اولدی، حمت یکی چیقدی .

دوشمانلره اخبانی ذم اولدی ظرافت،

دلداردن اغیاره شکایت یکی چیقدی .

صادقیری تحقیر ایله رد قاعده اولدی،

خبرسیزلره اکرام و عنایت یکی چیقدی .

حق سویله یین اول دخی منفور ایدی کرچه،

حائسلره آما که رعایت یکی چیقدی .

اوراق ایله اعلان اولونور جمله نظامات،

الفاظ ایله ترفیه رعیت یکی چیقدی .

عاجز اولانک کتم اولونور حق صریحی

محمیلری هر یرده حمایت یکی چیقدی .

اسناد تعصب اولونور مرد غیوره .

دینسزلره توجیه رویت یکی چیقدی .

اسلام ایتمش دولته پابند ترقی

اول یوغیدی ایشبو روایت یکی چیقدی .

ملمتی نسیان ایده رک هر ایشمزده ،  
أفكار فیرهنگه تبعیت یکی حیقدی .

ایواه ! بو بازیچه ده ییزلر یینه یاندق ؛  
زیرا که زیان اورتاده ، بیلهم نه قازاندق .

ظاهرده کوروب ییزلری صانعا عقلایز ،

ییز بیر سورو عاقل صسفتنده بدلایز .  
عاقل دینیلیرمی ییزه ، کیم حالی بیلیرکن ،  
دلداده آلایش نیرنک هوایز .

یاران وطندن ییزی اوزلهر بولونورسا ،  
دوشسده سفر غربته محتاج دهایز .  
ترکیب عجیب ایکی خاصیتمز وار ،

أجابه نرک دولتی ییز ، خصمه بلایز .  
کنجیده دورور خرقة من آلتنده کنوزات ،  
درویشلرز ، کرچه نظرده فقرا ییز ،

عقبایه یاران بیرایشمز یوق ایسه باری ،  
آزاده دل شائبه زوق و ریایز ،  
« دولتلو » لره ییزلری تحقیر دوشمری ،

بیز عاجز ایسه کده یینه مخلوق خدا ییز .  
بیر آفت خونخواره أسیر اولدی کو کول کیم ،  
هر نازینه هر لحظه ده بیک کره فدایز .

- خاطرده دورور صحبتك لذتی حالا ،  
کرجه اوشرفدن نیجه بیلدره، که جدایز .  
هرجورینه راضیلرز، ای شاه ملاحته ،  
ایسته ر بیزه لطف ایله ، دیلهر بیزدن ایراغ اول  
دنیاده همان سن شرف و شان ایله صاغ اول .  
هرملت ایچین بیردوزی به عدلکی عام ایت ،  
فکر غضب حضرت معبود انام ایت .  
بوال جه زمزمی لعنتله آکار خلق ،  
سن کبه کیبی کندیکی حرمتله بنام ایت .  
ایچینه مک ایسته رسه ک اکر ملک فئاده ،  
بیر کیمسه بی ایچیتمه مک حصر مرام ایت .  
بیر یرده که یوق نغمه کی تقدیر ایده جک کوش ،  
تضییع نفس ایله مه ، تبدیل مقام ایت .  
عورت کیبی مغلوب هوا اولما ار اول ، ار  
نفسک سنی رام ایتمه به ، سن نفسکی رام ایت .  
مانند شجر ثابت اولور ثابت اولانلر ،  
مهرانکی ایشک أهلی ایسه ک اونده دوام ایت .  
نقصانکی بیل ، بیر ایشه یا باشلاما اول ،  
یا باشلادینگ کاری پذیرای ختام ایت .

او غرار سنه صبا راهك أكر سمت عراقه ،  
بغداد ایلنه دوغرو دخی عزم و خرام ایت.

حردان سخندانی زیارت ایدوب اوندن ،  
آداب ایله کیت روضه روحی به سلام ایت.

تحسینتی عرض، ایله یوب اولجه (ضیا) نک ،  
بو یتتی حضورنده اوقو، ختم کلام ایت .

میدان سخنده یوعیکن سن کیبی یر آر  
یرشاعر روم اولدی سا کا شیمدی برابر.





## ترجیع بند

۱ — بوکارگاه صنع عجب درسخانه در ،

هر نقش بیر کتاب لاندن بر نشانه در .

کردون بیر آسیاب فلا کتمداردر ،

کویا ایچنده آدام آواره دانه در .

مانند دیویچه لرین التقام ایدهر ،

کهنه رباط دهر عجب آشیانه در .

تحقیق اولونسا نقش تمائیل کائنات ،

یا خواب ویا خیال ویاخود افسانه در .

منجر اولور امور جهان بیر نهایت ،

صیفک شتایه میلی ، بهارک خزانه در .

کسب بقینه آدم ایچین یوقدر احتمال ،

هر اعتقاد عقله کوره غائبانه در .

یارب! نه در بو کشمکش درد احتیاج ؟

انسانک احتیاجی ، که بیر لوقمانه در .

- یوقدر سپر بوقبه فیروزه فامده ،  
ذرات جمله تیر قضایه نشانه در ۔  
اصل مراد حکم ازل بولمادر وجود ،  
ظاہرده کی صواب و خطا هب بہانہ در ۔  
بیر فاعلاک ماثریدر جمله حادثات ،  
نہ اقتضای چرخ ونہ حکم زمانہ در ۔

سبحان من تحیر فی صنعہ العقول  
سبحان من بقدرتہ یعجز الفحول

- ۲ — اجرام بی نہایہ ایله پردر آسمان ،  
نسبت اولونسا ذرہ دکیلدر بو خاکدان ۔  
بیک شمس تابدار و ہزاران مہ منیر ،  
یوز بیک ثوابت وینجہ سیارہ عیان ۔  
ہر شمس ایدہر توابع مخصوصہ سیلہ سپر ،  
ہر تابعہ توابع اخری ایدہر قران ۔  
ہر شمس ایدہر لواحقنہ نشر فیض خاص ،  
ہر لاحقک طبیعتی أمثالہ نہان ۔  
ہر جملہ مرکزنده ایدہر سیربی وقوف ،  
ہر قطعہ محورنده بولور فیض جاودان ۔  
ہر جملہ وسیعہدہ مبسوط بیک وجود ،  
ہر قطعہ فسیحہدہ مشہود بیک جحان ۔

- هر پير وجود مصدر اولور بيك وجود ايجين ،  
هر پير جحان هزار جحاندن ويرير نشان .  
هر ذره ده طريقه مخصوصه اوز وه فيض ،  
هر جسمه طبيعت مخصوصه اوزره جان .  
هر عالمك سنين وتواريحي مختلف ،  
هر پير زمينده باشقا حساب اوزره در زمان .  
پيوسته در سواحي كرداب حيره ،  
پير بجزدره كه حاصلی بو بحر بيكران .

سبحان من تحير في صنعه العقول  
سبحان من بقدرته يعجز الفحول

- ۳ — پير ذره در ، كه ذره نامتهای خاك ،  
پير ذره خارجه ايده مهز اوندن انفكاك .  
لي لبيب نار ايله پير كوي آتئين ،  
قشري مجاري يم و نهر ايله چاچك .  
نسبتله قشري حجمه اول لب آتشك ،  
شول قبه در ، كه فرش اولونا اونده برك تاك .  
بو قشر در كه جمله حيوانه روز وشب ،  
احضار رزق وتوشه ايجين ايله ر انهامك .  
كاهي تنفس ايله يچك اژدر زمين ،  
كوه شرر فشاندر ايده ر ارضي لرزه ناك .

- اول ذره جسيمه بي فانوس شمع وار ،  
اولس محيط توده بتوده نسيم ياك .  
كيم روز وشب اوسفره عالمشولدن ،  
هر نفس رزقن آلامده بوجه اشتراك .  
بو نقطه در يمن وشمالی بيان ايدن ،  
ايلاز جهانه عقل بو مر كزدن انسلاك .  
ذرات كون بونده بولور نشوه حيات ،  
أفراد خلق بونده چكر جرعه هلاك .  
خسيده فراش اماندر نفوس هب ،  
بيرطوب شعله ناكده بي قيد وهم وباك .

سبحان من تحير في صنع العقول ،  
سبحان من قدرته يمجز الفحول .

- ع — دندان شيره لوفا اولور آهوان زار ،  
بير كوسفندي طعمه قيلار كرك جانسكار .  
بي جرم ايكن غذاي عناكب اولور مكس ،  
معصوم ايكن كبوتري شاهين ايدهرشكار .  
تاجز ايكن عقابه كرفتار اولور كشف ،  
غوك ضعيفي قوت ايدنير بي وسيله مار .  
بي جنحه ماكيان بجهي چاك ايدهر زغن ،  
بي ساقه دوپاره ايدهر موشى موشخوار .

- کنجشک زاری باشه بران هلاک ایدره،  
ایلهر تذروی پنجه غدرنده باز خوار .  
مار زمینه لوفا اولور مرغ تیر پر ،  
مرغ هوایه طعمه اولور ماهی بحار .  
غواصی حرص کومر ایدره لقمه نهنک ،  
کبکی امید دانه ایدره تلهیه شکار .  
دردانه درونی ایچین چاک اولور صدف ،  
آوازیدر قفسده ایدن بلبلی نزار .  
بیدسترك هلاکنه خایه اولور سبب ،  
قتل سمور زاره اولور پوستی مدار .  
غالب زبونی قاعدهدر ایله مک تلف ،  
یرده ، هواده ، بخرده جاری بوکیرودار .

سبحان من تحیر فی صنعه المقول

سبحان من بقدرة یمجز الفحول .

• — گاه (که) آفتاب و گاه کواکب، کهی جاد،

اولدی اله معتقد زمره عباد .

که عجل و گاه آتش ویزدان و آمر من ،

که نور و ظلمت اولدی فضایی اعتقاد .

عقل و جمال و عشق اله اولدی بیر زمان ،

بتلر (پوتلر) له دولدی بیر نیجه بیل جمله بلاد .

- انجام ایردی نوبت توحید ذات حق ،  
کلدی ظهوره بونندهده بیک فتنه، بیک فساد .  
که عین وکاه غیرصانوب خلق وخالقی ،  
که جمعه ، کاه فرقه عقول ابتدی اعتماد .  
اولدی هزار ذات دینوب که صفاته عین ،  
بیر اصلده کهی بیجه اصل ابتدی اتحاد .  
هرشخص نفس عنصرینه نسبت ایله یوب ،  
عقلجه بیر اله مشخص ایدهر مراد .  
یکدیگره نه رتبه مخالفسه شخص و عقل ،  
عالمده اول قدار متخالفدر اعتقاد .  
حکمت بودر، که آخرینه خصم اولدر، بیلوب ،  
هر قوم کندی مسلکینی مهج سناد .  
أما بو اختلاف ایله مقصودی جمله مک ،  
بیر خالق خلوص ایله ایتمکدر انقیاد .

سبحان من تحیر فی صنعہ العقول  
سبحان من قدرته یعجز الفحول .

- ۶ - کلر کولر، فغانله کچر عمر عندلیب،  
بیمار اختضارده اجرت دیلور طیب .  
مانند لاشه نفس توانکر ذلیل و خوار ،  
کر کس مثال وارث وغسال نا شکیب .

- بالین نازه خواجه شهر ایله اتکا ،  
خاک مذلت اوزره یاتار آج بر غریب .  
پرتو فروز بزم طرب شمع خنده ریز ،  
پروانه شکسته بر افتاده لیب ،  
نوم و بصل چونر کس ولاله کشاده لب ،  
محبوس کنج محفظه تنکناده طب .  
بستر نواز عز و صفا احمق خسیس ،  
کلخن نشین ذل و هووان عاقل حسیب .  
که دولت جهاندن ایده رجهل بهره یاب ،  
که لقمه عشادن ایده ر عقل بی نصیب .  
مقبول بزم صحبت اولور مقصد لیم ،  
منفور طبع عالم اولور ناصح مصیب .  
گاهی محفر جهلا شاعر بلیغ ،  
گاهی مسخر حقا فاضل ادیب .  
بر عاجزک معیشتی نقصان پذیر اولور ،  
بر ظالمک اموری ایده ر کسب فروزیب

سبحان من تحیر فی صنعة العقول ،

سبحان من بقدرته یعجز الفحول .

۷ — یارب! نه در بود هرده هر مرد ذوقنون

اولش بلای عقل ایله آرامدن مصون !

يارب! نچين بو عرصه ده هر شخص عارفك  
مقدار فضلنه كوره دردی اولور فزون!  
هرهانكي سويه عطف نگاه ايتسه بي حضور؟  
هرهانكي شينه صرف خيال ايتسه عقلي دون.  
ممکنيدر حقيقت اشياي وزن و درك؟  
ميزان عقله درهم تعديل ايكن طنون.  
کنجیده بصيرت اولور می بو عجز ایله!  
حيثيت حوادث و کيفيت شوئن.  
کویا که بو نجه محنت و غم آ ز کلوب اولور،  
برده تحکم جهلا ایله باغری خون.  
بیلمه مکه مقتضای نظام جهانمیدر!  
دائم جهانده جاهل اولور مسعدت نمون:  
جاری جهان جهان اولایدربو قاعده،  
بر احمق دنی به اولور اهل دل زبون.  
نادان فراز عز و سعادتده سرفراز،  
دانا حقیض عجز و مذلتده سرنگون.  
نادانی کامبرور ایدر طالع بلند،  
اهل دلی محقر ایدر بخت واز کون.

سبحان من تجیر فی صنعه العقول

سبحان من بقدره یه جز الفحول



- ۸ — دوشدی جدا نعیم صفادن ابوالبشر ،  
اولدی خلیله تجربه که کردن بشر .  
یعقوبی قیلدی فرقت فرزند اشکبار ،  
اولدی جناب یوسفه چاه بلا مقرر .  
ایوبی علت بدن ایگله تدی زار زار ،  
منشاره ایله دی ز کربا فدای سر .  
باشی کسیلدی غدر ایله یحیی مرسلک ،  
چیقدی سایه ظلم ایله عیسی بی پدر .  
طائفده نعلی لعله دونوب ، اولدی هم شکست  
یوم احدده دره ناب پیامبر .  
طاش باغلادی مجاعه ایله بطن پاکنه ،  
دنیا به رعبت ایله مهدی سیدالبشر .  
تأثیر سمله ایله دی صدیق ارتحال ،  
اولدی شهید تیغ قضا عاقبت عمر .  
أعجام ایردی فاشر قرآن شهادته ،  
آخر جناب حیدروده ابتدی تیغ اثر .  
مسموماً ابتدی ذات حسن عدنه انتقال ،  
مظلوماً اولدی شاه شهیدان بریده سر .  
هر کیمده عشق غالب ایسه قرب حضرته ،  
اول دکلی اونده در ألم و درد پیشتره .

سبحان من تحیر فی صنعہ العقول

سبحان من بقدرته یعجز الفحول

- ۹ — کیمدر بوعجزی خاص قیلان نوع آدمه؟  
کیمدر بونوع اشرف ایدن جمله عالمه؟  
شیطان ونفسی کیمدر ایدن آلت شرور؟  
کیمدر قویان زبون هوایی جهنمه؟  
منصوری کیم دوشوردی (أما الحق) دیارینه؟  
کیم ویردی حکم قتل ایچین شرعاً کرمه؟  
کیمدر شرابی حرمت ایله تلخکام ایدن؟  
اعمال جام وبادیهی کیم اوکره تن جمعه؟  
کیمدر یهودی منکر اعجاز حق ایدن؟  
کیمدر مسیحی فتح قیلان ذات مریمه؟  
کیمدر ویرن جسارت شر وفضاحتی؟  
سفیانه ، جمدهیه ، شمره ابن ملجمه؟  
کیمدر نصیر طوسی علا کویه سوق ایدن؟  
مستصمی کیم ابتدی قرین ابن علقمه؟  
کیمدر ویرن علیه نداوی به احتیاج؟  
کیمدر قویان مزیت اصلاحی مرهمه؟  
زنبور کیمدن ایلهدی تحصیل هندسه؟  
بلبلره کیم ایلهدی تطیم زمزمه؟  
کیمدر بوکار گاهه چکن پرده خفا؟  
کیمدر ویرن تصور قتییش آدمه؟

سبحان من نجر فی صنه المقول

سبحان من بقدرته یسجز الفحول

- ۱۰۔ ایتش کیمیسی راجتن اقبال ایچین فداء ،  
اولش کیمی بلیه ادباره مبتلا ۔  
اولش کیمی توانکر دوران ایکن ذلیل ،  
اولش کیمنه ثروتی سرمایه غنا ۔  
طوپلار کیمیسی وارث و حادث ایچین نقود ،  
ایلهر کیمیسی ثروت ایچین عمرینی هبا ۔  
دوشمش کیمی تجسس کبریت أحمره ،  
اولش کیمنه موجب افلاس کیمیبا ۔  
ایتش کیم حریص قتال ، آرزوی شان ،  
قیلمش طمع کیمیسی جان داده و غنا ۔  
اولش کیمی مسخر افسون چشم یار ،  
اولش کیمی مقبذ کیسوی دلربا ۔  
ایتش هوای لاله کیم داغدارغم ،  
اولش کیمنه دردکل ویا سمن بلا ۔  
تفریق ایچین کیمیسی اوقور رقیه فسون ،  
تسخیر ایچین کیمیسی یازار نسخه دعا ۔  
اولش کیمی صفا ایله رند پیاله کش ،  
اولش کیمیسی حرص ایله افتاده ریا ۔  
ایتش خلاصه بیر أمل خاص بی لزوم ،  
هر شخص حری قید أسارتله مبتلا ۔

سبحان من تحیر فی صنعہ العقول

سبحان من بقدرته یعجز الفحول

- ۱۱ — مظلومہ ظالم ایلہر ایکس ظلم وغدرو آل  
کارندہ آتم اولدیغنی ایلہمز خیال .  
أموال خلقی سارق آلوب سارقم دیجهز ،  
قاتل وبال قتله دخی ویرمهز احتمال .  
بیروجه حق بیان ایدہر ألبته فعلنه ،  
هر هانکیسندن ایلہر ایسه ک ایریجه سؤال .  
بیر مملکتده صلب اولونور قاطع طریق ،  
بیر یرده موجب شرف وفخر اولور بو حال ؟  
بیر بلدهده حجاب زنان عیب اولوب یینه ،  
بر شهرده بو حالت اولور باعث جمال .  
مشرب اولور شرابی ایچر ، حرمتن بیلیر ،  
مذهب اولور حقوق عبادی کورور حلال  
بیر عاقل مسلم الا طواره محرم اول ،  
مشوار و طورینی نظر اعتباره آل .  
سیرایت نه دکلی وضع ضریبی ایدہر ظهور ،  
کیم هریری جنونه اولور باشقا باشقا دال .  
وابسته در خیالنه أفعالی هر کسک ،  
کیمسه امورینه ایدہمهز نسبت ضلال .  
عقل وجنونی ، باطل وحقی بیان ایچین  
یوقدر جهانده ، حیفا که ، میزان اعتدال .

سبحان من تحير في صنعه العقول  
سبحان من قدرته يعجز الفحول

- ۱۲ — ايلهر صباح شامی و لیلی نهار ایدره،  
• صیفی قیلار شتا و خزانی بها ایدر .  
• نزع حیات حی ایدره، امواته جان و پریره،  
• ایلهر غباری آدم و جسمی غبار ایدره .  
• جسم حلیله ناری ایدر نور قدرتی  
• نوری کلیمه حکمتی همرنگ ناز ایدره .  
• لیلی حسی چشمه شیرین ایدوب مدام،  
• فرهادی درد عشق ایله مجنون و زار ایدر .  
• دملرجه بیر طعمه قیلار قلبی بی حضور،  
• ییللرجه بیر امله دلی بی قرار ایدره .  
• بیر ملکی بیر حریم ستمکار ایچین بیقار،  
• بیر قومی بیر منافق ایله تارماز ایدره .  
• بیر جسمی عز و ناز ایله صد سال بسله یوب  
• انجام کار پنجه مرکه شکال ایدره .  
• یوز ییلده بیر وجودی قلوب کنج معرفت،  
• آخر یرین نشیمن خاک مزار ایدره .  
• عارف اودر، که معترف عجز اولوب (ضیا)  
• بو حادثات جاریه دن اعتبار ایدره .


ملککنده حق تصرف ایدر کیف مایشاء

ایستهرسه کونی یوق ایدر، ایستهرسه وار ایدر

سبحان من تحیر فی صنعہ العقول

سبحان من بقدرتہ یعجز الفحول

— صوک —



YaziveKitap.blogspot.com

YaziveKitap.blogspot.com

فیاتی 15 غروشدور.





YaziveKitap.blogspot.com